



# Chamna Aw

(A Monthly Organ of the Evangelical Synod Church)

Vol. XXXIV

No. 04

July, 2019



2 PATHIEN THIL  
TAWNPIEK LAL ISU

20 ISRAEL TE'N ISU A  
PAWMLOH UH

2019  
KUM  
THUPI:

“THUOKHAT TAKIN TAI HITIU”

HEBRAI 12:1

Editor: Rev. T. Kamgin Gangte

**Vol. XXXIV No. 04**  
**July, 2019**

### **Editorial Board**

**Chairman:**

Upa Dr. L.S. Gangte, M.A. M.Phil.

**Editor:**

Rev. T. Kamgin Gangte, M.Th.

**Asst. Editor-cum-Circulation Manager**

Rev. Khaitinthang

**Bible Study:**

Pr. Khailalsiem M.Th.

Evan. Paukhomang B.D.

**Contributing Editor:**

Upa Paozalun BA

Rev.Khaigin BD

Rev. L.Sata B.Th.

Rev. Thangkhoiem M.Div.

Rev. T. Kampu M.Th.

Rev. Henkholien MBS

Miss Chinbawi MRE

**Editor ana hite**

- |                        |           |
|------------------------|-----------|
| 1. Upa Lalkhogin       | 1986      |
| 2. Rev. Khaigin Gangte | 1987-2005 |
| 3. Rev. Lamkhawsat     | 2006-2013 |
| 4. Rev. Thangkhoiem    | 2014-2017 |

## contents

- Editorial..... 01
- Pathien thil thawnpiek Lal Isu..... 02
- Sabbath hih Lalpa ni a then..... 04
- Kitelna (Election) ..... 07
- Mission Column ..... 10
- Bible Society hawhmalama  
Pathien nasep kiphuonna ..... 15
- Israelte'n Isu a pawmlöh uh ..... 20
- Synod Bible School 2019 genlatna ..... 22
- Lal Isu zuih dan ding ..... 24
- ESC Synod Bible School Graduates..... 30

- Kumkhat lakman Rs. 150/-
- Thusuoh nuom nei te'n ESC Office  
Post Box-54, Chiengkawnpang,  
Churachandpur a thak ding.
- Ala nuom leh a man pie nuom te'n  
circulation Manager, hetsak ding.
- Thukisuoh cheng hi ESC Ngaihdan  
ahi vek khel puoi. Article zikte'n a  
mawh a kipuok chiet ui.

#### **CHAMNA AW PHUNGVUKNA DING**

- |                   |   |           |
|-------------------|---|-----------|
| 1. Chief Patron   | - | ₹ 5000.00 |
| 2. Patron Member  | - | ₹ 4000.00 |
| 3. Diamond Member | - | ₹ 3000.00 |
| 4. Gold Member    | - | ₹ 2000.00 |
| 5. Silver Member  | - | ₹ 1000.00 |

PRINTED AT  
THAWNSAAU PRINTING WORKS  
CENTRAL LAMKA

Joshua'n, "Kei leh ka Inkuote hin chuh Lalpa na ahi ka sep ding uh," (Jos. 24: 15). Zie tak Bible chang hi vak en hitiu.

Joshua hi Pathien kihcha mi ahieh hetchietsa'n ngai hiting un, Pathien kihchami khat chun a vak ngaihkhawk mahmah khat I Bible chang tel uh ahin vak galmuh theih aum hi. Zie a vak galmuh theih a um chuh, a Insung ngaihkhawka hi ahi. Joshua'n Lalpa na a sep nawp thu agen hi hetsa'n ana um taleh, kuomah hi Lalpa na sem nuom chiet ding in vak kikawih hiting un. Zie khela I vak gennawp chuh Insung a ngaihkhawka hi ahi. Asawt apal I he puoi, Insung ngaihkhawklote'n buoina vak tuok ziang kileule bangtik ahim leh hun tuok ngeingei ding ahui, tih hi a chiensa ahi. Israel chate'n le Pathien thupiek hezing tho ngal in a Insung uh, a nam sunguh ngaihkhawklorna ziekin gamdang pathien ana limsiem sek uh a, anam un sietna a tuok u a, Babulon suok ah a saltan lawh daih ui.



Sapchuom hih Pathien chate kilawih khawmna ahi a, Pathien chate dinga Insung ahi. Zieziek chun, Sapchuom hih ngaihthah theih mai ding ahi puoi. Sapchuom ngaihthahna ahung um chun, Sapchuom niemkiekna tuok loh theihloh hung hiding ahi. Sapchuom ahung niemkiek ngei ngei chun thagau lam leh taksa lam ah niemkiekna a um ngei ngei sek ahi. Zieziek hi ahi sap gam mun khenkhat, Pathien thu a ana hat mahmah te, "Ho-In akikhak hi," a tih sek uh. Sapchuom ngaihkhawk ding ahihna I hah gen ziek a Mission Field lam ngaihthah ding tihna ahi puoi. Mission field lam I ngaihkhawka ziek mah taka chu Sapchuom ngaihkhawk ding tih ahi. Thingzung ahawih a an pha achawplut hawih leh aleklama agah hawih thei chauh ahi. Mission field lam chauh ngaihkhawk a I sapchuom ngaihthah mai loh ding ahidan zie hin aheth theih hi. Anih niha hi apawimawh dan kibang ahi a, thiemthei tak a adjust bawl angai hi.

Joshua'n Lalpa na a ngaihkhawk muh ahi a, zie masanga vak muh theih chuh, "Inkuon" ahi. A Inkuon phataka a ventup zieka Lalpa na a ngaihkhawk theih chauh ahi, tih hi a muhtheih hi. Tuhin le Missionary na I ngaihkhawk theihna ding chun, amasang ah Sapchuom a um ding ahi. Insung leh Sapchuom akituploh chun Missionary nasep hat zing theilo ahi. Missionary nasep ahath zing laia Sapchuom gelkhawk ahiehloh chun ana chauhtha thei zing ahi.

# PATHIEN THIL THAWNPIEK LAL ISU

Evang. Lamzagin

## Changtel - Johan 3:16

“Pathien in khawvel a hehpih mah mah ziekin, a Chapa changkhat neih sun a pie a, amah huh kuole a gingcha taphawt chuh a manthai loh u a, kumkhuo a hinna a nei zawn au.”

Himahlele, Pathien chun a mi hehpihna chuh pahchak takin ana latsak a, migilo I hih lai u a, Krista I sik u a a thih ziek khan. (Rome 5:8)

Krista Isu tawh I kipumkhatna zieku chun, amah tawh thakhat a ei kaitho khawm in, van mun haw a khun, a kawmah ei chut sak ta a. (Ephesi 2:6)

Tichun, I Lalpau Isu Krista mawng leh, Pathien I Pau, ei hehpihpa leh, a lungsietna vanga, hansanna thawn lo leh, kinepna det ei piepa chun, (2 Thesolonika 2:16)

Mihiem Chapa hi mihingte hinna sumangthai dinga hung ahi puoh a, amau haw hukdam dinga hung ahi zawi, a ti a. Tichun, khuo dangah a chieh tau hi. (Luke 9:56)

“Na kam in Isu chuh Lalpa ahi tih na phuon a, mithi lak apat Pathien in a kaitho hi tih, na lunggil a na ginchak chun

hukdam in um inla,” tih hi, mite’n lunggil in a gingchau a, diktatna a mu sek ui; kam in a phuong u a, hukdamna a mu sek ui. (Rome 10:9-10)

Taksanna zieka, lungsietna a hukdam na hi tau hi; zie chule nangmau a pawt ahi puoh a, Pathien thilpiek ahi; (Ephesi 2:8)

Zie taka hin Pathien in a hehpihna chuh I chungu ah a hun sulang tai, amah vanga I hin theihna dinguh a, a Chapa neihsun khawvel a a hun sawl ahin. Ziehi ahi hehpihna chuh; eimau in Pathien I hehpih ui ti ka hi puoh a, ama’n ei uh ei hehpih a, I gitloh uh lutchamna hi dingin, a Chapa a hun sawl hi ti ka hi zaw ie. (1 Johan 4:9-10)

Isu Krista, thu hetpih taksanum tak, mithi lak apat a kaihthawh a um masapen ding pa leh, leia lengte vaihawmpa kawm apan chun A lungsietna leh chamna na kawm u ah um hen. Ama'n ei hehpih a, a thisan in I gitlohnau apat ei tandawk a, tichun, a Pathien leh Pa lenggam thiempu nasem dingin ei siem ta a. A hii, Isu Krista kawm mawng achun, lopina leh vaihawmna chuh kumkhawtuong in um hen. Amen. (Thuphuon 1:5-6)

Ei u dingin naupang a hung pieng a, Chapa piek in I um tau a! Vaihawmna chuh a liengko ah um intin; Amin chuh "Mak, Lemguottu, Pathien Hat, Kumsawt Pa, Chamna Lal Cha," tih hi ding ahi ngâla. (Isaiah 9:6)

Bible hi khawvel a lehkhabu kisudawk tampen, khawvel a lehkhabu kizuok tampen leh khawvel a lehkhabu kisimtampen ahi ana tiu hi.

Pathien thu/Bible hi lehkhabu/sakhuo bu dang cheng cheng sanga a chengnunna chu kumsawt hinna ei pie a, kumsawt gawtna le a siem hi.

Kuole, amah gingcha chuh mawh changin um puon au,

kuole, a gingcha lo chuh, tu akipat ziang hin le mawhchang in a um ui; Pathien Chapa changkhat a ginchak loh ziekun. (Johan 3:18)

Pathien in khawvel mawhchansak dingin a Chapa khawvel ah a hun sawl puoh a, amah zieka hukdam a aum theihna dingun a sawl a hi zawi. (Johan 3:17)

Bible thu thiengtho hi, Setan in a suksiet ding hileh Johan 3:16 na hi susie masawpn in a, ana tiu hi. Chanchinpha Johan 3:16 na hi ana kigen tampen a, zie bang hin miten a na tiemteh ui.

Evangelist minthang mah mah mai D.L. Moody in zie Bible chang hi mang in sermon ana bawlana ah mi 8000 in hukdamna a chang ui ana tiu hi.

Evangelist khawvel ana chawking Billy Graham in zie Bible chang mah hi mangin thugenna Kolkatta khawpi ah khat vei thun mi 3000 in hukdamna a chang ui ana tiu hi.

Oswald J Smith inle zie bung leh chang mun mah hi mang in, thu a genna ah mi 5000 vel in Toronto khawpi ah hukdamna ana chang ui a tiu.

London khawpi ah Spurgeon in zie bung leh chang mah hi mangin thu a gen na ah mi 1000 hiel in hukdamna a chang ui ana tiu hi.

Evangelist D.L. Moody in a thih ding kuon in, “Hun khat mang kit thei hileng chu aw, zie Pathien thu tak Johan 3:16 hi ka sermon ut mah mah nalai hi.” tin ana gen hi ana tiu hi.

Pathien thu hi a hing a, thil a hih thei a, chemzâm hiem tuok sangin le a hiem a, hinna, thagau leh guh kisuktuohna, theng sukhen thei hiela sun thei ahi; chuleh, lunggel leh lungthim ngaihtuohte hetuok pai zieng thei ahi. (Hebrai 4:12)

Bible thu tak/thu hingmang in Lalpan a thu vangsak ta hen.

~~o0o~~

## SABBATH HIH LALPA NI A THEN

*By: Pastor P. Thanglalmuon*

Sabbath hi chawlh tih na ahi a, thiengtho taka matding ahi. Pathien lehkhabu thiengtho apat in, Adam, Abel, Enok, Noa, Abraham, Isak, Jakob leh Joseph te'n amat uh muh ahi puo a, ana manglo hi ding ahiu hi. Mosi hun apat in Isu thawhkit kikal, kum zabi 15 apat in mat ana hia, Juda hotute chun tuni chan hin ana mang tau hi. Sabbath hi chidang dang aum a,

- (1) Thiempudante 23:3 - Kaltin ni sagih ni.
- (2) Thiempudante 23:24-25 – Tha sagihna ni masapen.
- (3) Thiempudante 16:29-32. – Tha sagih ni sawmna.
- (4) Thiempudante 23:39-44 – Tha sagih ni sawm leh nga na leh ni gietna.
- (5) Thiempudante 25:1-7 - Kum sagihna.

Bible a akimuh masakna, Pawtdawkna 16:23, mana piek a aum lai uh ahi, Kuote a dinga piek ahi?

- (1) Pawtdawkna 19:25, 20:1-11 - Pathien in Mosi mang in Israel chate dinga a piek ahi.

- (2) Pawtdawkna 31:12-13 - Pathien leh Isaelte kala tiemtethna ding ahi.

Isu'n Sabbath hih a manga, Sabbath a mat lohna le muhding aum kit hi. Isu hih Sabbath lal ahi, Mark 2:28, Sabbath a mat kitna Mathai 11:28-30. Isu a thawhkit nung in ni 40 sung lei ah a um nalai a, a sinsakte tawh Pathien gam chanchin a sinsak sek hi. Nasepte 1:3 Isu khan a thawhkit nung in Sabbath a mang ta puoi, mahleh a sinsakte'n a thawhkitni champha a mat uh khan Isu le a lak uh ah a tel hi tih muh ahi, zie hin Pathien in Sabbath chuh Lalpa ni, Isu thawhkit ni Pathienni'n a theng hi tih theih ahi.

**Pathienni Isu'n amang a, a mite a pawl hi:**

- (1) Mark 16:9 - Mari tawh a kipawl ui.
- (2) Luke 24:1-10 - Mari tawh a lawite tawh Isu a kipawl ui.
- (3) Luke 24:13-32 - Emau lampi a chiehte tawh a kipawl ui.
- (4) Luke 24:1-7 - Indan chungnung ah sinsakte tawh a kipawl ui.
- (5) Johan ahin a sinsakte ni sagih ni masapen in a pawl hi.
- (6) Johan 20:26 -Thomas leh sinsak dangte tawh a kipawl ui.
- (7) Nasepte 1:4-6 - A umkhawm uh a a kipawl ui.

**Sapchuom masa ten Lalpa ni amang ui.**

- (1) Nasepte 2:1-11 - Lalpa ni amat lai un thagau thiengtho ahungtung a, Penticost ni ahi.
- (2) Nasepte 20:7-12 - Troas khuo ah Lalpa ni a mang ui, sacrament a neu hi.
- (3) 1 Korinth 16:2 - Ni sagih ni masapen chun mitin in malsawmna a chan bang zel un kawihkhawm vek uh, Paul in a tii.
- (4) Nasepte 11:20 - Sapchuom masate a kikhawm sek uh a, Lalpa nitak an a ne sek ui.
- (5) Hebrai 10:25 - Pathien hona kikhawp taihsan lo ding in a kitilkhoh zing ui.

**Pathien inle a ngai pawimawh hi'n a:**

- (1) Nasepte 2:1 - Pathien ni a a umkhawm lai un, thagau thiengtho ahun sawla tuni tieng hin ei umpih tai.

(2) Thuphuon 1:10 - Johan chuh Lalpa ni chun thagau in a um a, thuphuon bu hawih tak I neih lawh ui.

Sapchuom masate chuh chanchinpha genna lam ah a kimang nasau a, Sabbath kimatna mun achun Sabbath a matpih sek uh a, hun ahung sawt a, mi ahung pun tam phet un, tawbang thil chuh bawl ngailo ahung hi ta a, tua Pathienni I mat chauh hih ahun mang tau a, khangthakte leh a sinsakte tawh a mat uh chuh I mang zawm uh a, Lalpa ni hih 321 AD khan Rome Lengpa Constantine chun sawlkal chawlhni in a siem ta a, zie apat chun Lalpa ni hih sawlkal tawh matkhawm ahung hi tai.

Tuni chan hin Lalpa ni hih, Pathien in ei matpih zel in ka he a, thagau gam thutak leh malsawmna I dawn tamna niu ahung hi zel hi. Kolossa 2:16 – “Khutichun, nek thu ahim, dawn thu ahim, kut ni thu ahim, thathak mat thu ahim, chawlhni mat thu ahim in kuoma'n hun awi mawh kihen.”

~~o0o~~

## THUCHING KHENKHAT

By: Rev. Khaitinthang

1. Minphatna hih ei leh ei kipiek ding hilo in mi'n ei piek ding uh ahi.
2. Mi pahchak dinga na kingaihlai chan, kipahna tak tak mu ngei puon la.
3. Mi kamtam leh mi genthei tak te haw hi mi thanuom leh fel aum ngei puoi.
4. Mi pahchak ding nuom te haw hin, midang pahchak lem a bawl sek ui.
5. Pathien tih loh kuomah buting aum ngei puoi.



# KITELNA (ELECTION)

GK Gangte  
Ex Sub. Maj. (CMP)  
Shillong.

Khawvel kivaihawmna hihenla sapchuom kivaihawmna hita leh puitu ding tel zelna hin vaihawmna leh kivaipuok dan a suna vak a, zalenna le aum hi. Kitelna umlohna mun achun mimal vaihawmna ahih ziekin apha le ei diek puoi.

Kivaipuokna him him hi khawvel dungzui a election system a chieh deuh ahi a, atangpin sapchuom leh social hi chieh khawm deuh guol in lang mah leh, chipchil taka et in kibatlohna lienpi a nei a, sapchuom kivaipuokna chu Dan leh Muol ki zik thawh mahleh sunggil lamtak a Pathien ngaih a thieng leh thienglo aum ahi.

I Samuel 3:9 na ah Israel ten leng aneih loh ziek un aki phin ua, mahleh, leng neilo ahih uh Pathien in a hetloh ei puoi. Pathien in a thiltup a suklat man mipite deihtelna leng dingin SAUL a tel ua. taksa lam a et in a ting a, Israel lak a tangval melpha pen le ahi. Ahin, Pathien in zie chu a tel puoi, leng Saul chu a tel ngei ua, vai le a hawm ngei hi. Ahin, Israel khang thu a dingin Dark Period chuh Saul vaihawm sung hi ahi. A gam ah muonna aum puo a, sugimtheihna, melma tawh kidona, Pathien khut thawkna hun chu ahi mai hi. Pathien mitel David a dinga le gimtheih tawp thawkna hun chu zie hun sung hi ahi. Mahleh Pathien in leng din David chu A tung dawk tho tho a, Saul chu leng himahleh ui thih in a thi ahi (1 Sameul 31:4). A let hun in lien mahleh atawpna chu muolpho na ahi. Aziek chuh Pathien guot loh mihiem deihtelna a ki tungdawk ahih ziekin ahi.

Pathien Sapchuom puitu ding I tel tieng leh chit theih a kul mah mah a, I gam sung I et chun kitelna thu ahin zahchak umna

tampi I tuok tau ui. Zie haw zieka hi sapchuom khangto thei tak tak lo leh buoina tung tha zing ahi.

Tha tin a kisuoh Evangelist kiti ka na sim khakna, ka lung sukha mah mah aum a, hun sulang ing ka.

1. Shillong ah Presbyterian sapchuom ah Upa kitelna aum a, pa fel tak mai khat a teldawk ua, sapchuom te le akipak mah mah ui. Himahleh teldawk a um pa chu khawmpi a namdetna chang din a chieh nuom ta puoi. Mak a sa mah mah zieng ua, aleh Upa tel I tih hi le kum chenga tel theih ei puo a, aleh, a tel kit ding a hih phet un, ziepa mah mah chu vote tam zaw dieka ting in a tel kit ua. Aleh khawmpi a namdet ding hun in a chieh kit ta puo a. A tel te haw chula dah a kisa mah mah ua. A thum veina dingin a tel kit u leh zie pa mah chu a tel ting ua. A thumveina a chun amah le tha lawp tak in ordination chu a va la ta ahi. Sapchuom ten, aleh amasa te nih kha bang zieka chieh lo na hi? a tih u leh, “Nang un ei deih leu chun le ka zin ei ginchak loh ziekin vote ei pie puo a, ka zin ei ginchak loh bangtin namdetna la thei ding ka him!” tin a dawng ahi.

A thupi tak zet hi maw! Anupan un Isu Krista a nei ua, a muchien ui tih a kilang hi.

Unaute, vote hawl a taih viel viel chuh um puon a tih akilang hi maw? Zie Upa pa chan dan hi lopi tak zet hi maw?

2. Sapchuom election hun a vote hawl zieng kiti hi um thei ahi, mahleh thagau lam mit vak na nei ten chu mak salo thei puon ua. Zie malak chun I hihna suklatna ahi a, ei leh ei ki zawkna mai mai ahi. Kuo ahim kaih ding leh kaih loh ding ziek a kisa lah hi kisaklahna kihdak um pen ahi a, lu khawng umlo Pathien muh a namsie leh ningsiet um ahi sek hi. Zielo achun, Pathien thu lam leh pauchamna lam ale hat mah mah zieng, ahih zieka sapchuom kitel hun leh paucham ding hengilh bang zieng khawp a kitelna thu a kisa lah taluo ki hi mai sek ahi die aw! Tihloh theih ei puoi zie hun haw hi ei ve Thagau a thuk leh thuk lo kihetna chu. Bangzieka ei mai hi kiki en mai sek ahi die! I Bible sim suok thu gen gen

mai paucham akhawk dan leh hahpan ding ahih dan te gen zing ahih zieka kitelna cheng a buoi buoi zieng haw hi a piengthak hilo in a piengsuol hi din ka ging chai.

3. Sam 37:7 “Lalpa achun châwl inla, Amah chuh ngak tun tun in” a tii. Sapchuom mawhpuokna hi kichuh thawh ding ei puo a, kinawk thawh ding le ei puoi. Pathien zai ngaka, amah phasak dan dan a ngaikham taka tawih ding ahi zawi. Ei tel dawka I um hun a hahpi a sem ngalin midang tel tin ahih tieng a ki lepsan zieng haw hih Hotu pha ei puoi I tih te hi zuitu pha ana hi sek ui. Mi zathuop ngaplo chu puitu pha hi ngeilo ahi. Sapchuom a chanmun a neih loh leh muh phak le hitalo haw hi, Pathien gam a chan nei nailo ahi nuom hi.

Israel ten Leng Saul a tel guol ua hi, mihing lam et a I tel khak ding a lauh um a, a tit inle a titloh inle Pathien lemguot a I ngaih theih hi thil pawimawh pen pen ahi. Zie tieng chu leh Lalpa phasak dan hung kilang ding ahi.

Lalpan I zik hawu cheng hi hethiem a tunung ale zawp thei chiet din ei vangsak chiet ta hen.

~~o0o~~

## **THUCHING KHENKHAT**

6. Khawvel hi Krista Lalgam ahih loh ziek in kipahna buting khawvel ah mu ngei puon la.
7. Khawvel hi butin lohna gam ahi tih hengilh kin.
8. Thu chuh na gen tam phawt leh, na gen khiel tam mai ding ahi.
9. Thugen thei tak te hi, mi diktak tamlo ahi.
10. Pathien chuh anei tu ahi a, I kawl zawh dinga pha a sak cheng chauh ei kawl sak ahi.
11. Pathien hi mihiem te kipahchak bang ahih, pahchak mai chi ahi puoi.

## MISSION COLUMN

Kum kim tieng ei puia, A na isepkhawm ei phalsak nalai, Lalpa Pathien min pahcak in um hen.

Lalpa hehpihna thu, chanchinpha kipak um tak mai, tuhun leh chatuon tieng daih ding Hukdamna lopitak henailo leh changnai lo te dinga, I nasep nau Lalpa'n ei vangsak to zel a, chiehzawm zel theia I um ziek in Lalpa pahcak in um hen. Lalpa kawma kipahthu I genna ding uleh, I paucham pih ding uh tamlo a nuoi ahin ka hun sulang hi.

1. Mission Conference 2019 thiltup Lalpa'n a lawhtin to zel a, Missionary Supporters le a kibehlap to zel a tuni (May 15, 2019) tieng in Mi 150 phet phet ihi tau hi. Tukum sunga mi 200 tieng bek muh kinem kawma pauchamna tawh pang zing ihui a, a pang nuom te ading a pan theih zing ahi. I hetsa guol un, tuletua a Missionary tuoklawm I piek khawm hawu hin, I Missionaryte chawm zo lo ihui a, nang na hung pan na ziek a, gam lak beh zel thei ding ihih ziek in, zie napha sem ding ahin hung pang in la, guolphala le hawl zel hitiu. Missionary Supporter a kibehlap zel ziek in Lalpa kawm ah kipak thu gen hi tiu. Chuleh, Missionary Support Fund le gamla leh nai apat in fund ahunglut hawihzel a kipak a um mah mah hi. Lalpa'n na sepna chiet uh a, hun vangsak zawm zel hen.

### Missionary Supporters May Issues ban zawm..

- |                                |                         |
|--------------------------------|-------------------------|
| 145. Mrs. Khumi                | - Langol                |
| 146. Upa Pautinlam             | - Langol                |
| 147. Mr. Lama B. Gangte        | - Langol                |
| 148. Mr. Siemlalthuom          | - Langol                |
| 149. Pu Songgin                | - Longpi                |
| 150. Pr. T. Goulienmang        | - Abhicharan, Tripura   |
| 151. Mr. S. Thanglien & Family | - Chiengkonpang/Lamphel |
| 152. Mr. Minthang              | - Lamphel               |
| 153. Mr. Lienboi               | - Lamphel               |
| 154. Mr. Goutinsiem            | - Langol                |

2. A Tha lawh cheng Missionary Chawmna dinga pie thiengvek:

Khanpi Khuo a um, Mr. Khamginlien S/o (L) Khuptinlam hih a khuou a Ho In dak khen in apanga, a tha lawh cheng January apat May tha tienga ding Cheng khat le sit lo in, Missionary Chawmna ding in ahun pie a, ngaihsan a um in, kipak a um khawp mai. A bana le hun pie zawm ding ahih thu het ahi. Lalpa'n amah leh a Insung vangsakna tamtak in vangsak zel hen.

3. Baptisma Chang: - Manipur Phaigam mite lak ah I sepkhawm nau, Lalpa'n ei vangsak a, gingthak kibehlap to zel in, a chiehsa Missionary Day 2019, 7<sup>th</sup> May, 2019 ni'n Ithing mun ah, Loktak Lake a gingthak mi 6 in Lalpa Isu Lal leh Hukdampa ding in pawm in, Gingu hihna Baptisma (Believers Baptism) Rev. T. Kamgin, Exe. Director, ESC'n a chansak hi. Zie ni mah hin, Lalpa Nitak Ankuong (Lord Supper) guonggalh ahi. Lopina Lalpa chang hen! Ginna ahung pitin zel theihna ding un paucham pih zing hitiu. Amau haw chuh:

- i. Mr. Kh. Basu Singh S/o Kh. Ibohal Singh, Ithing Takmu Leikai
- ii. Mr. K. Mangi Singh S/o K. Nillo Singh, Ithing Takmu Leikai
- iii. Mr. Kh. Bigyananda Singh S/o Kh. Ningthem Singh, Ithing Maning Leikai
- iv. Mrs. M. Marina Devi W/o M. Binod Khana Singh, Ithing Mayai Leikai
- v. Miss M. Ichan Chanu D/o (L) M. Babu Singh, Ithing Mayai Leikai
- vi. Miss M. Merita Chanu D/o M. Mukta Singh, Ithing Takmu Leikai

Lungthim khawih mah mah leh puokna um mah mah khat chuh, Baptisma a chan ni zing uh 08.05.2019 ni'n Baptisma changte lak a tel Miss Ichan Chanu (Sl. No. v) pienna Pa Mr. M. Babu hih Imphal a nasem a chiehna'n Oinam mun ah Car in a phukha a, amun in abei ngal hi. A pa sun zing lai un, khuosung mite'n a chate Christian ah alut ziek uh (Baptisma) achan ziek ua, Ithing Lai in athah ahi atiu hi. Ichan Chanu suopihte, Thomas leh Jephtha

hile Christian ahiua, khangdawng, taksa leh thagau a naupang cha cha ahih naklai ziek un, ipaucham pihnau hi a pawimawh tak zet hi. Lalpa apata hetthiemna leh thamuonna aneih theihna ding un, I paucham nau ah delh zui zel hitiu. Chun, tuhin, a pienna nu, a palien leh insung mite'n a chate Christian a alut ziek ua, insung vangsietna tuok hidinga a ngaih ziek ule hiding ahi a, Thomas te unau hih Sapchuohte laka tel leh Ho In kaih ding aphal sak ta puou a, paucham pih hitiu.

4. Quarter Tuong zawh hita: Tripura Mission Field a, Mokam mun ah Missionary Quarter a tuong siem dinga pawimawh mah mah mai, siemthei lo a aki um zing chuh, Synod HQ. Church te panlakna, tawmgaihna leh gamthim ahehpihna ziek chauh uh hilo in, semtute a lungsietna ziek un pan ahun lau a, siem zawh ahih tak tawh kizui in a um te - Evan. Lalpaul te'n aluoh kit tau a, nuom chuom mah mah ahih thu het ahi. Lalpa kawm ah kipak thu gen hitiu. A luotu te taksa leh thagau a a chawldam na mun uh ahih a, hatzaw sema Lalpa na asepzawm zel theih na ding un paucham pih hi tiu. Synod HQ. Church te chung ah kipakthu Lalpa min in I gena, napha tam zaw sem, semzel thei ding in vangsak zing hen.

5. Balaram Khul ah Bible Seminar lawhting taka matzaw hita: Manipur Phaigam a I nasep ns mun uh khat Balaram Khul ah achiehsa 29-31 March, 2019 sung Bible Seminar neih ahia, lawhting taka mat zawh ahi tai. Zie Seminar hih Synod HQ. Church te Sponsor na nuoi a neih ahi. Lalpa'n lopina chang hen. Vak hettheih khat chuh zie mun a Ho In hih Imphal Area Mission Board (New Lambulane, Lamphel leh Langgol) te'n ana sak uh ahi.

6. Bible Seminar Follow up - One Day Seminar: May 19, 2019 ni'n Bible Seminar Follow up, Balaram Khul mun ah neih ahi a, zie hun ahin ,mi 50 lak vel ahung tel ua, Thugentu in Rev. Henkholien mah apang hi. Pathien zal in lawhting taka mat zawh ahi. Synod HQ. Church te panlakna nuoi ah neih ahi a, An kuong limtak mai achieh khawmte'n sawk khawm ahi. Chun, zie ni hin, mi 4 baptisma a chang ui. A mau haw chuh - 1. Seram Sangita Devi w/o S. Samson Meetei, 2. Seram Obadia Meetei S/o

S. Arun Kr. Meetei, 3. Seram Oliveboy Meetei S/o S. Arun Kr. Meetei, leh 4. Seram Sushma Leima w/o S. Obed Meetei te ahiu hi.

7. Synod Foundation English Medium School (SFEMS), Lefunga, Tripura a Cl. X (CBSE) Result a pass percentage 90.9 tung:

2018-2019 CBSE nuoi a Class X result a suok tawh kizui in SFEMS ah naupang 44 exam lak ah, mi 40 a pass ua, mi 4 in compartment amuu hi. Pass Percentage hih 90.9% a tung zo hi, Lalpa'n School ministry lam le ei vangsak zel hih tih muhtheih in a um a, Lalpa kawmah kipak thu gen hitiu. School enkawltu te leh semtu cheng Lalpa'n a hawihzaw, aphazaw a semzawm thei ding in vangsak zel hen.

8. Tripura Mission Field Audit: May 10 -12, 2019 sung Upa

P. Bieklien, Chairman SEB, Mr Letkhokam, Cashier leh Pr. Khailalsiam, Director, M&E te'n Tripura Mission Field Audit a va bawl ua, Pathien zal in, sumlepai lam a le ikhangto zel ua, Annual Income hih 1 Crore a val thei tai. Lalpa pahchak in um hen.

9. Evangelist Quarter sakna ding Ground Breaking bawl: Tripura Mission Field a, Doi Para mun ah, Evangelist Quarter sakna dinga tawmngaih suoh a hungpang Lamphel ESC leh Nu Mawikim te Inkuon in a sak ding uh Quarter chuh May 18, 2109 (Saturday) ni'n Ground Breaking Upa Th. Lala, Chairman, Lamphel leh Pu S. Sonpee, Secretary, Lamphel ESC te'n ava nei ui. Lalpa'n Lamphel sapchuom leh Nu Mawikim te insung a thak tak in vangsak henla, zie project hih phatak a zawh ahih theihna ding in paucham na'n delhzui zel hitiu.

10. Manipur Mission Field Youth Camp 2019 lawhting taka zawh hita: Manipur Mission Field, Ithing leh Balaram Khul a Khanglai te dinga a kiguong Youth Camp chuh May 31 – June 3, 2019 sung Gilead Tlang, Kawnpui ah lawhting taka matzawh ahi tai. Zie Camp ahin Thugentu in Rev. Dr. Khaizakham leh

Evan. V. Lienthuom apang ua, camper hih mi 70 vel ahiu. Khangthak tamtak Lalpa a dinga hung kipie thak a um ui. Lalpa kawm ah kipak thu genkawm in, I paucham nau ah delhzui zel hitiu.

11. Ithing mun ah Ho In sak ding sawta pata (2016-2017) ngaihtuoh a um chuh tu hin, sakpat ding tin, Ho In le phiet thak ahi tai. Zie Ho In hih aluih tak ziek chauh hilo in, Ho In hin le member te a dawl ta puo a, sakphat hun takzet chuh ahi tai. Suong phumna hih Upa Niala, Chairman, Shillong ESC & Shillong Biel in June 30<sup>th</sup> 2019, 10:00 am in a nei hi. Zie Ho In hih Shillong ESC te neitu chan chang a, tawmgai taka pan ei lak pih ding ziek un I kipak tak zek ui. Sapchuomte pangkhawma phataka sakzawh vak ahih theihna ding in paucham pih hitiu. Tu hin, Agape Children Jr. School a Room neuchah ah aki khawm khawm sek ui.

~~o0o~~

## **THUCHING KHENKHAT**

12. Mi lungthim tawm chuh, mi chingte lungthim gendawk tun a pang sek hi.
13. Minsietna hih ni khat leh dakkal khat sunga bawl dawk theih ahi a, minphatna hi vang ni tamtak leh a kum ngai ahi.
14. Lawiupa hih ut taluo, kithalawpta luo haw hi lawiupa dinga ting lo ahi nuom sek ui.
15. Mihiem chitna leh thiemnan van thamzawl tieng a tun theih a, mahleh Vangam vang a tung thei puoi.

~~o0o~~



## BIBLE SOCIETY HAWHMALAMA PATHIEN NASEP KIPHUONNA

-Rev. K. Lampu

“Pathien thu hi ahing a, thil ahihthei a, chemzam hiemtuok sangin le ahieim a, hinna, thagau leh guh kisuktuohna, theng sukhen thei hiela sun thei ahi; chuleh lunggel leh lungthim ngaihtuohte hetuok pai zieng thei ahi.” –Heb.4:12.

Bible hi Pathien in a mite a lungsietna thu-a hukdamna buting taka hettheih a a suklatna ahih ziekin, zie Bible mangchaa a nasepna hi MAL A SAWM MAH MAH HI. Zieziekichun, Bible Society te nasepna ahin Pathien a lungkim in, a vangsak zui zel hi tih hi kichien takin het leh muh ahi a, zie haw chu I hettheihna ding ua vak suklat guo I hui hi.

BIBLE SOCIETY hi 1804 May 9 ni hin Rev. Thomas Charles leh London a milopi 300 valte kipunkhawm in ana phutdawk ua, amin dingin BRITISH AND FOREIGN BIBLE SOCIETY (BFBS) ti'n amin a sau hi, khawvel pumpia amasapen ahi. KOLKATTA ah February 11, 1811 kum in BIBLE SOCIETY OF INDIA (BSI) tih hi ana kiphutdawk hi, tutieng in kum 200 aval tai.

Awle, Pathien lunglam taka nasepna ahin a Pathien zie a suklatna leh bangkim bawlthei ahih zie vak ngaithai tui aw.

### I. DAMLOHNA NATNA “CANCER” APATA DAMNA:

Mrs. Khawvelthangi kum 72 mi chu May tha 2007 khan a naubu ah Cancer a um hi tih het ahung hi a, damdawi In ah kawih ahi a, a chau sawt mah mah mai a, chemo a khai pan ngal ua, Doctor te'n 6 vei tieng khaih ding tih ahi a, tichun an duhna a nei tapuoh a, amahnu hi BSI ah Patron Member ahi a, tichun BSI Unit Secretary pa kawm ah ava chieh a, a damlohna haw chu ava gen leh Secretary pa chun na damlohna chu BSI AH CHIEF PATRON in pansak in, ti'n ana thuhilh hi. Zie dungzui chun October 5, 2007 ni khan Chief Patron in a damlohna chu a pansak tai. Chemo a kikhaih hi Chief Patron a a pan ni tieng hin 4 vei a kikhai tai. Alah in a chau mah mah hi, mahleh chemo

5 vei tieng ahung kikhaih phet in, a kam hung lim in, an duhlo hiel a um kha An ahun duh mah mah tai. Doctorte thupiek dungzui in 6 vei chemo a kikhaih zawh phet in, November 13, 2007 leh December 17, 2007 in Hospital a chieh in, Doctorte'n a damlohna chu check a bawl ua, CANCER sulnung muh ding him aum ta puoi, Hallelujah Lalpa'n a sudam tai.

## 2. KALA SUONG UM APAT DAMNA:

Upa khat hile kum 2000 akipat khan a awm lak vel hungna'n Doctor a ki-check-up sak leh a kala suong um ahil a mandawk tau a, ti a chu bangti ti ahim a a etkawl ulele pha theilo, kum 6 sung buoi tak in a um ta a, atawp tawp in, BSI a a damlohna chu LIFE MEMBER a pansak a nuom ta a, hiti hin thu ahun gen tai- "Ka dampih loh lele zie Paisa hi Chanchinpha thehzakna a pang ding ahi," ti'n a damlohna chu Life Member a a pansak le a dam veng veng zieng hi. Lalpa'n a thilhitheihna a sulang zel hi. Lalpa lopina chang hen.

## 3. KHAWSIK PHA THEILO APATA DAMNA

- (a) BSI unit Chairman pa TUNN khawsik khawsik zieng chu kum 2008 kuma khan BSI a LIFE MEMBER a pansak u leh a damkei mai hi.
- (b) Mi khat, ZOMUANPUII kitinu hile khawsik dam theilo avel avela damdawi In a ki-enkawl zing zing nu hile LIFE MEMBER a a pansak uleh a damthiengkei mai hi. Lalpa'n a thil hihtheihna ahun sulang zel hi. Lopina Lalpa chang hen.

## 4. KHAM HAWLNA LAMA LAWHTITNA CHANG

Inkuon khat chagah leh haksa taka ki-akvak a khuosate hin a chapa'u chuh amawh mawh in, paisa a thung-apa a hawlkawm in lehkha a simsak ham ham ua, atawp in B.Sc. ahun zo ta a. Kham pha leh naseppha hawlana dingin Coaching bang lak angai hi, amau a ding chun vana gah bang mai ahi a, khutia chu lungdawng taka um in, Lalpa panpihna kinem in, BSI AH KHAM HAWLNA'N LIFE MEMBER in a chapa'u chuh a pansak tau hi. Hun chawmkhat hal in a STATE SAWLKAL in Sawlkal

chawma MBBS zil ding ahun hawl tau a, amahpa chule ava pan leh ahun la tau a, kum 6 vel zil in, tuhin DOCTOR muon-um tak ahi tai. Lalpa hi amah hawlte a ding hin apha na lawm lawm e maw! Lopina avel in Lalpa chang zel hen.

#### 5. MATCHAK, GARI- TAXI, BIKE TE BITTAKA UM

- (i) Mi khatpa hin a neihsun sun in Taxi hi Life Member in a pansak a, a In kawm ah lampang ah a kawih a, kiven theihna pen ti'n a Battery zan leh a ladawk zel a, khatvei chu guchate'n ava guk guot uleh Battery umlo ahi tih a het phet un, Battery thak a tuoh ua, mahleh tawldawk thei dieklo in, a nusieh ui. Zingkal a a neipa'n ava et leh Battery thak kituoh chu, ava mudawk hi, amak na e maw?
- (ii) Mi hausa khat hin Gari 5 vel leh Bike zie zah vel chu nei in, mun khat ahin a kawihkhawm diem duom mai hi, zan khat chu guchate'n ava buluh ua, Bike khat chu ava gudawk tau hi. Zingkal in a neipa chun a Gari haw chu ava etviel leh Bike khat chu ana gudawk tau hi tih a hetphet in, hitihin thu a gen hi, AMAK NA E! Abawn a BSI a LIFE MEMBER a ka pansak hi a, tikawm in a Receipt cheng a la a, a etviel leh zie pen chu ana pansak loh dan ahih tuok hi. Hitihin thu a gen kit hi, "A dang cheng hi Lalpa'n a melhet ahi a, zie amang pen hi Lalpa'n a he puo a, ahi ti kawm in, Lalpa'n amah a kikawlsakte chu a veng zing a, amah a kikawlsak lo te chu amang ding him ahi," a tii. Lalpa nasep dan hi amak hi maw?

#### 6. SUMKAWLVEINA APAT LAWK TAMTAK MU

Nupi khat Bazar a meh alawm lawma la a, zuoksawn hi a um a, amah nu chu BSI nasepna ahin a lung a lut mah mah a, Inkuon kim a, LIFE MEMBER a pan la anuom mah mah a, BSI Collector pa kawm ah BSI paisa Rs. 3000/- a bai ti'n zik ah ti'n a kitiem hi. Zie ni chun Bazar a a meh lakna ding nasan chule nei zolo, mahleh ava chieh tho tho ta a, mahleh maktak mai in, amah laksawnnate chun tuni hin aman piek masak le ngai puon a, na deihzah zah la zieng in, a tiu a, ama'n le kisuonglah tak pum in,

tamtak a la ta a, zawk zawh ding le lungthim a huphulh kawm tak chun, a zuok ta a, maktak mai in, sunma'n a zuok zo mai hi. A lawk le tampi a mu a, tichun a lunglutna mah mah BSI nasepna ah PATRON leh LIFE achun inkuon kim in a pang thei ngal ui. Lalpa'n amah nasepna a dinga kipie mihangsante hi a panpih zing hi tih a kilang mah mah hi.

#### 7. LALPA A DINGA MI TAWMNGAI, MI KIPHALTE:

- (i) MR. MIKHASHE CHOPHY: Dimapur a um pa BSI nasepna ahin a lung a lut in, theihtawp a pan lak anuom hi. Kum cheng leh a tha khat lawh a pie sek hi. Kum 2005 a kipat khan kum bul tha masapen, January tha lawh hi abawn in a pie sek hi. Kum 2018 khan Rs. 1,17,000/- a piei.
- (ii) DR. R.K. DATTA (Eye Specialist) pa hile BSI nasepna ah a lunglut mah mah hi. Kum tamtak masang lam apat khan kum cheng leh cheng sing chung lam hi a pie sek hi. Tumasang lam deuh apat khan ENDOWMENT FUND FOR BSI ti'n kum khat in Rs. 60,000/- a piei, tuhun hin amah chu Lalpa kawm ah a chawl ta a, mahleh a zinu MRS. AVILA DATTA hin a pasal thih nungin, zie a pasal nasepna chu sunzawm in, Rs. 40,000/- a behlap a, kum cheng leh Rs. 1,00,000/- (Cheng nuoi khat) a pie zing hi, a lopi ngei ie maw?

#### 8. BIBLE SUNDAY THAWHLAWM

Kum cheng leh BIBLE SUNDAY hi December Pathienni masapen hi mat ahi sek hi. Kum 2017 Bible Sunday khan Senapati a MAO BAPTIST CHURCH ASSOCIATION te'n Rs. 1,00,190/- (Cheng nuoi khat za leh sawmkuo) a pie khawm ui, a lopi hi maw? Zie ni a thawhlawm kipiexhawm haw hi Bible Society nasepna a pieklut zel ahi. Mite'n zie Missioary nasepna hi Lalpa Pathien kipahna leh agam kekletna ahih zie hi a heu a, thanuom tak in leh paptak in Lalpa gamletna dingin a piekhawm zung zung ui. Ei lak achun ahinna tak leh atup leh a nasepna hi I he taluo nailo uh abang hi, ngaihtuoh hitiu.

Zie a chung a Bible Society panpihna a min chuom chuom leh dinmun chuom a Life Member, Patron Member leh Chief Patron a pang in, Lalpa gingcha tak pum in, a vak pieu a, Thagau mangthaite matna dinga a thilneih uh Paise a vak piekteu ziek in, Lalpa alung akim in, Lalpa'n le a thil hihtheih zie a sulang zel zel ahi. Lalpa Isu'n "A GINGCHA LEH TAKSANGTE DINGIN BANGAKAI HIHTHEIH VEK AHI" ana tih kha adik to zel hi.

Zie Pathien nasep dan chichuom chuom leh a gam kekletna dinga mite haw kipiek zawdan te hi ngaihtuoh in, Patien cha chiet chiet kihi a, bangti dan ahim? Ngaihtuoh takzet in, kingaihtuoh hitiu. Lalpa'n zie thu haw hi mang in, simtute cheng cheng gahsuoh thei dingin ei malsawm chiet tau hen.

~~oOo~~

## CHAMNA AW PHUNGVUKNA Chief Patron

Nk. Nancy Nemneihvak, Hill Town, Pathien in A sapchuom te hengilh mai lo in, tuni tienga Chamna Aw Phungvuktu ding ei piek zel ziek in A min lopi pahchak in um hen. Ziekhel achun Nungak Nancy, Nemneihvak hi Lalpan ama puizel hen la, maban a le a sepna ah Pathien vangsakna chang in, atam zaw sem pie thei dingin Pathien in vangsak hen.

## ISRAELTE'N ISU A PAWMLOH UH

Rev Dr Ellien Gangte

Israelte'n Isu a pawmloh dinguh hi Pathien in Ana guotlawk ahi dem? Isu Kraws a khetden ding kha Thiemgaute'n ana genlawk sau himahleh a diklo lama ana ngaihtuoh a, ahilo lam lam a ngaihtuoh le ana um bawk ui. Pathien in Amah ana pawmloh dinguh chu a guotlawk ahih chun diktatna umlo ahi. Israelte'n Isu a nawlh, pawmloh dinguh bangmah ana guotlawk puoi. Isu'n Israelte adingin chanchinpha A na gen zing a, Kraws akhetden a ana um nungin le amau dingin ana paucham hi. Chun, Isu'n, "Hepa, amau hi ngaidam in, a thilhih u hi a he puou hi," A ti a. Chun, a silhlechen chuh phunsân in a kihawm u a. Luke 23:34

Judate'n Isu Krista hih Kraws a, a khetden dingun ana guotlawk sa ahi puoi. A lungthim uh a tâk, khauh ziek u a, thudik pawmlo a, Isu a nawlh dinguh vang chu hetlawkna anei hi. Isu chu Kraws a khenden lo dingin le gaih in, A tutâng diek puoi. A thil guonggalh haw supiting dingin anawh puoh a, mahleh a lungchang phatnau, a lungtâk nau lemchang sa a, a thil guonggalh haw sukpititna'n amang sek hi. Israelte'n Isu ana pawmloh uh hi amau ngei sukkhelh lientak chu ahi. Israelte lak apat thudik hawl pawl in Isu taksanna leh ginchakna anei ui. Israelte cheng chengin Isu a pawmloh uh, a deihloh uh ahi diek puoi. Israelte laka Isu pawmlo pawl haw chu migilo, thudik deihlo pawl ahiu hi.

Pathien in thil bangkim chu A hemasa a, mahleh amau chu khuti mawng mawng dinga A guotlawk uh aum puoi. Pathien in A hun leh a mun a thil tung haw manga A thil guonggalh haw hih A sukpitit sek zawk ahi. Pathien in mihing a gitloh sak puoh a, mahleh a diktatna supiting dingin mihingte chu a hun leh a mun a ana mat zel zawk ahi. Juda Iskariot ngei inle Isu ana matsak

hi. Pathien in Juda Iskariot lungthim a khah gitlohna aum sak ahi puoi. Sum a ngaihnat ziek chauh a Isu nung a zuih ahi. A duh-amna sukbititna ding leh a sum-le-pai ngaihnat ziekin Isu nung a zui a, Isu'n a duhthusam bang tak leh a kineppih bang taka apanpih takloh ziekin atawpna ah Isu matsaktu in a hung pang hi. Pathien in Juda Iskariot lungthim leh gitlohna A he a, A lungthim, thagau mangthaite hukdamna ahih theihna ding lampi ka khatah a um sak ahi. Isu Krista'n Juda Iskariot chu A nungzui dingin A tel a, A hehpih a, a tawp chan in A nungzui dangte bangmah in A lungsiet hi. Juda Iskariot sukkhelh lienpen chu amah-leh-amah akithah hih ahi. Tichun, Juda Iskariot chun dangka chuh mun thiengtho achun a seplut a, a taihsana, tichun, a chieh mang a; a va kikhailum ta a. Matthai 27:5. Kisik, hihkhiel kisa mahleh Lalpa lamah kileh kitlo ahi. Deihnelna hih mihing apat ahih ziekin Lalpa'n a bawl ding bawlo dinga pawng haihsak lo ahi.

Chun, Isu'n, Chiehkân Kut maa zie khawvel hi pawtsan a, Pa kawma chieh phat a tung tai tih A he a. Amah mi, khawvel a um, A hehpih sekte chuh, a tâwp tiengin le A hehpih zing a. Johan 13:1 Juda Iskariot le Isu'n a tawp tiengin A hehpih zing hi. Mi diktat chuh sagih vei puk mahlele a tho kit zel sek; mi gilote vang chuh sietna'n a sumangthai sek hi. Thuchingte 24:16. I vakmang nau apat a kihedawk a, Lalpa lamah I vaihkit ua, Lalpa deihlam, thilpha I bawldawk uh I kideihsak ui! Amen!

~~o0o~~

## SYNOD BIBLE SCHOOL : 2019 : GEN LATNA

Evangelical Synod Church Synod Bible School neih ding hi ESC/AC-2016/Res.No.45 na phasak ahihna ban ah, ESC/EC.2017/01/13 Res.no.2na dung zu'in Board Of Christian Education ah behlap ahi. ESC/AC-2018/Res.No. 34 dungzui in Synod Bible School tih a, a min ding namdet ahi. Synod Bible School hi kum 3 Course hi dinga phasak ahia, phatak a zote chu Diploma in Basic Theology Certificate piek phasak ana hii.

Synod Bible School : 2019 June 11 – 27 sung, ESC Khukpi, Secretariat, Chiengkongpang ah ana um a, mangzo thei dinga I mau puitu Lalpa Jehova Pathien chungah kipahthu I gen ui. Synod Bible School 2019 ah mi 36 a kai ua, mi 35 phatak in Examna a nei bawk ui. Pastor 3, Upa 10 leh Evangelist 3 phatak in tel thei ua, I kipak takzet uh ahi. ESC Council thupukna dungzui a, Semtute, Upate leh mi vantang a telnuom haw telsak dinga hun guonggalh leh hun panpihtu Khawti'n a Sapchuomte Lawiupate chungah kipahthu ka hun gen hi. Synod Bible School : 2019 Sinsaktute'n tawmngai tak a sinsakna ei neihsak ziekun a chung uah I kipak tak zet ui. Synod Bible School : 2019 a hung pang, Pastorte, Evangeliste, Skulpute, Upate, Nu-le-pate leh mi vantang Bible zil nuomte chungah kipahthu I gen ui. Sapchuom a Puitu, Bible hetna a hung kibat phatleh I deihdan leh I chieh danuh hung kibang sek ahihna zalin, nanguh zieka Sapchuom sunga kituokna leh khantohna a hungum I kineppih nau ahi. Maban ahle hung pang zawm zel dingin I kideih sak ui. Synod Bible School hun sung cheng a, tuonvai, Nek-le-chak limtak a guonggalhtute chungah le kipahthu I gen bawk ui.


Evangelical Synod Church khangthu a um ngeilo, melchik tak Synod Bible School Graduation Day masapen chu June 30, 2019 in Synod Hq. Church, ESC Chiengkongpang ah kipak taka neih ahi. Kum thum zilzo a, lawhting taka zo mi 28 Diploma in Basic Theology 'Dip.B.Th' piek dawkna Rev. Khaigin Gangte, Chairman, BCE'n anei a, Commsioning Service Rev. T. Kamgin Gangte, Executive Director, ESC'n anei hi. Mi 28 lakah a



Guolchung chuong mi 4te a zawnau Course average ahih uleh:  
1} Mr. Haolalthom of K. Laitui: - 76% (A) 2} Mrs. Venny of  
Chawngchin: - 75.1% (A-). 3} Rev. T. Doukap of Santing: - 73.9%  
(A-). 4} Mr. Kamzathang of Chawngchin: - 73.9% (A-).

Lalpa umpihna changa Diploma in Basic Theology zote'n  
aumna mun chiet u a, Sapchuomte etkawlna a, a hun na mat  
uh I deihsak uh ahi. "Thutak thu diktaka khen zah châk na ding  
neilo nasemtu bangin, Pathien mitmuha pha bukim a kilang  
dingin phachuom ngai ah. 2Timothy 2:15. Synod Bible School  
zala, Pathien apat thudik tak I hetteu, I umnau Sapchuom chieta  
phatak a, puokdawk heihna dingun Lalpa'n I mau puizel taken!

Krista A, na seppih uh,



Rev Dr Ellien Gangte  
Director, BCE,ESC

~~o0o~~

## Ngetna

*Chamna aw hi subscribe a, Articles a hun pie  
zing ding in leh subscriber ding hun hawla  
sponsor hun bawl zel ding in, chun aphung  
vukna ale pang ding in na tawmngaihna leh  
deihsak nau Pathien min in ka hun ngen ui.*

*- Editorial Board*

# LAL ISU ZUIH DAN DING

(RUTH 1:16-18 LUKE 9:57-62)

By: SM/Clk Paukhawgin Gangte  
HA, 13 Assam Rifles, C/o 99 APO

(Copy write and modified from Synod Revival Speakers Sermon)

1. Judai gam Bethlehem khuo a Inkuon khata pa pen min chu Elimelek kiti a um a, a zi min chu Naomi ahi, amau nupan chun chapa nih Mahlon leh Kilion a nei ui. A gam uh a kiel akiek ziekin haksa a sau a, Moab gama nek ding aum ziekin a kipem u a. Hun-sawt le um man nai lo in Insunga pa pen Elimelek chu a thi tamai a. Zie nung chun a chapate nih chun Moab numei Orpah leh Ruth chu zi'n a nei u a. Khutia chu kum sawm vel aum nungun a chapate nih Mahlon leh a naupa Kilion chu le cha neilo in a thi gel gel tamai u a. Khutichun Naomi leh a mote nih chu pasal sun ahung hi tau a. A nu pen Naomi chu a pasal leh a chate sunna'n a lunggel agimtheina banah a mote nih um dan ding ngaihtuoh in a buoia haksa asa mah mah a. Moab gama vak um zing chule amah dingin zachakum inle a gel le himai ta'n tin. A gam lam (Judai) a kileh kit dingin a lunggel ta a, khutichun a chieh tau a. Khutia a chieh lai un Naomi chun a mote nih kawm achun, Ei puoi! Na nu In lam gel u ah kileh kit dingin chieh mai tiem u khai. Mithi chung leh kei chung a na hih guol ukhan Lalpa'n na chung u ah ngilnei tak in hih zaw ta hen a ti a. Lalpa'n na nih un na pasalteu In a na khawsak theihna ding un hun vangsak zaw ta hen, a ti a.

2. A pinu thugen guola um chuh a mote nih chu a utlam uh ei hiel puo a. Zie guola chu a nu pen in nanguh te nih ziekin ahi ka lungkhamna hi azuol deuh deuh, zieziekchun ei nusieh mai un, a ti a. Khutichun hahkah in a kap u a. Orpah chun anu chuh a chawp tun tun a, a chieh thei ham hi. Khutih lai chun Ruth chun a nu chu a tuchak a. A nu chun, na mopihnu le, a chipihnte kawm

leh a pathien kawma dingin a kileh kit ta a. Nang le na mopih-nu um in um inla chieh mai ta aw, a ti a. Ruth chun anu kawm achun hiti hin a dawng ta a. “Na chiehna tak ah chieh ing ka ting, Na giehna taphawt ah giek ingka, a ti a”. (Ruth 1:16)

3. Naomi dinmun asiet zie leh a gimtheih zie chu, Judai gam ah kilehkit mawng lele a umna ding, a khawsakna ding leh a belh ding nasan le neilo ahieh zie a hechien a. Khuti ahieh nasan ale a nu phatsan lo a , a belh tun tun zie leh a nu chiehna chenga zui a, a umna chenga um dinga a kipiekna hi athuk in, anu a dingin thamuoan um mah mah di’n gingchak aum hi. Ruth chun a pasal chauh a lungsiet puo a, a pasal nule khuti taka a lungsiet hi zuitu dik leh miginum ahi na lawm lawm e. Naomi ding in le vak nan chi ahiehloh zie mai chu, a muh in a lungawi mah mah di’n gingchak aum hi. I dinmun siet laitaka ei phatsan lo a, lungsiettu mel vak muh hin lunggel azang in chawldam aum mah mah mai sek hi.

Mari te khale, Lalpa Isu mata a um zan apat khan lungthim thawmhau tak in, um hiet hiet thei lo leh gamla tak ale pawt ngam lo in, gal apat in a muh theihna tei ding ngaihtuoh in muh a guo zing u a. Kalvari tang lama a chiehpil lai unle, thana a siel thuu haw he’n a ngaihven zing u a. Chawlni ahieh in zingkal matak in, Isu than lamah a chieh u a. Amah taka chuh a um takloh thu leh Galilee gam lama a chieh thu a het un, a chieh meng meng u a. A sinsakte kawmah a chieh u a, Lalpa a thawhkitna thu leh Galilee gam lama a chieh thu ava hilh ui. Lal Isu’n haksat a thawk lai hunale ana ngaih-sak zingte kha zuitu dik leh ginum hi’n au e maw?

“Lal Isu’n kuole ei zuih a nawp chun amah gimthei khawksa lo in nicheng in Kross pu’n ei zui hen” (Lk. 9:23) a tii. Ruth hin a nu a zuihna ahin duhthusam mai hilo in, a lawp/phurlai taka a gendawk mai mai ei puoi tih het ahi.

4. Ei haw’n le, Lalpa Isu I zuihnau ahin, Ruth guola zuia, phatsan lo a hehpilna tawh zui khawm zing dinga I kipiek diu ahiehzie muh ahi. Lot zi guola malam zuon dinga thupiek I hihlai un, nunglam en lo in, malam en in kalsuon zel zawi tiu.

“Na chite chu ka chite hi’n a” (Ruth 1:16)

5. Ruth hi Moab mi Jentel I tihteu ahi a. Naomi a zuihna ding ahin, amah hihna kha nusieh (haihsan) in Naomi chi (Juda) kikawppih ding in a kipie (surrender) a. Naomi adinga hing ding in a kipie (Moab mi hih na bei) ta ahi. Khuti chun Ruth chu mi thak ahung hi ta a. Naomi Judai gam tieng a zuihna ding ahin, a nu hinna a kikawppih a, a taksa bak khat guola um chu ahih ding chu ahi ta ahi.

**Paul in** Kuole Krista a um chuh, kisiemthak ahung hita a, thil lui cheng chuh amang ta a. Ngaitiem u, ahung thak kit tai, ti a a gen guol khan (II Kor. 5: 17).

6. Ruth chun Moab mi a hihna chu paih a, amah achun athi ta a. Athak tak in Juda mi hin in a hing tai. Mi’n Lalpa Isu a ginchaka amaha a hin tiengleh, zie khawvel mi hihna (a paih) a thi a. Van mi hinna ah amah a lut a. Zie hinna apat chun Lal Isu zuitu hihna a nei sek hi. Halleluija! Lopina Lalpa chang hen.

Na Pathien chu ka Pathien hi’n a (Ruth 1:16)

7. Ruth hi amasa sangin Naomi kawma a kipiek lutna hi alul in athuk zawi. Moab pathien ana ho/biek sek kha nusieh/deih ta lo in, Naomi Pathien a ding in a kipie’n, a kilhan tai. Naomi le athu guolpih thei ta a. Nan ding chi ahih takloh zie muh in aum hi. Ama’n pha a tih cheng leh a deih cheng cheng nusieh in, Naomi’n pha a tih cheng leh a deih cheng hih ding in, kithawihna hing leh theingtho hidingin a kilhan a. A nu thu thua um ding in a kipie tai.

Gingtute hile Lalpa Isu I zuihnau a, pha I sak cheng leh I deih cheng, etc. Lalpa Isu’n pha a sakloh leh a deih loh cheng chu haihsan ahung ngai hi. Aziékchu amah thagau I kikawppih leh amaha dinga hing ding I hih tak ziekin, I utna cheng kha nutsieh angai hi.

“Na thihna ah thi'ng ka ting . . . . (Ruth 1:17)

8. Ruth chu numei sie hilele a hangsan in, a deihtelna chu Naomi zuihna dinga mihing hih theihtawp a hinna tieng pie dinga a kitiemna a gentel a. Zie a kitiemna hi a gen mai mai ei puo a, hih buting dinga kipie ahi. A nu dingin kipah um in, lungkim mah mah zieng in a, a ngaihnat zawk sem ngei le ginchak aum hi. Ruth in zie thu a genlai hin anu chu a tuk den zing ginchak aum hi. Khutia chu a gen ziekin Naomi'n le a lunggel a theng ta a. Ruth chu a chiehna taka chieh a, a giekna taphawta giek a, a chite chu a chite hiding leh a Pathien chu a Pathien hi ding leh a thihnaa thi ding chun a pawm a, a kikhen ta puou hi.

Awle, ei haw le, Lalpa Isu I zuihnau ahin, I maua suol/gitlohna um haw, Lalpa Isu I zuihnau a, phatsanna dingah buoina, ei nangtu hung um sek haw hi I kihetmawh sak/thihsak zel kawma I zui dinguh hi apawimah takzet hi.

9. I thupi'u apat in Lal Isu zuitu hangsan tamtak lehkhahu leh thusima kigente, thih chana ginuma um haw kha geldawk hitiu. I gamsung a Pathien thu ahung lut tunlai in, Saichang khuo ah, I pi leh I puteu in haksatna tampi kalah mi 7/8 vel in Pathien thu ana awi masau a. Amau haw kha ana ginum ziek un khuosung ale cheng thei lo khawpin Pathien ana ho u a, tuni hin ei haw a chateu, Lalpa vangsakna chang in, I nam pumpi'n Lal Isu zuitu I hi tau hi. Bible sunga mite, Sapchuom chanchina mi masate le lawiupa tamtakte'n Lal Isu phatsan lo a hangsan taka, haksatna mun ale thuokngap in, amah gimtheih khawksa lo in, I gamsung leh khawvel mun chuom chuoma te khan ana zui tun tun u a. Martar na tieng ana changte haw kha zuitu ginum leh zuitu dik ahi na lawm lawm nau e maw! Amau haw kha ningtina nehviel in um leule, a hinna tieng nasan le chan ding hileule kipak tak leh thu awi tak in ana zui u a. Midangte a dingin thagau lam malsawmna tuntu ahiu ui tih ei hetdawk saka a lopi takzet hi.

10. Sadhu Sunder Singh in a Insung leh Sikh sakhuo nusieh in, anu leh apa muhdah leh nawhdawk na tieng ngap in, Lal Isu zuihna ding a channgam in, chuleh chanchin pha zieka thaw-

knafe leh a vakvaihna zozaithe leh Tibet gama a chiehnaa haksatna leh gimtheih a thawk lai a thagau thiengtho in a thamuonna leh a puihnate zieka Pathien thilhih theihna a chante haw kha, Lal Isu zuitu ginumte chunglang ding mawng ahieh zie I het in a lopi takzet hi.

**Lal Isu'n-** “Thih tiengin ginum in um inla khutichun hinna lallukhuk chu chang inla (Thuphuon 2:10) a ti a. Lalpa Isu zuitute leh thuoktute kawma gen hi adik mah mah mai hi.

11. Tangval khat hin, Aluminium a kisiem Kross lim aban chawmna bantaka GOD tih kizik leh aban sauna ban a ‘O’ tawh akimatna bul tak a ‘LOVES YOU’ tih kizik hi a chiehna cheng ah a awk sek a. Khatvei mun gamla taka anu dawn dinga bus a a chieh lai in, zan in Restaurant khata bang ahim ne dinga a lut lai in, numei khat tawh dawhkan ah a chukhawm khau a. Nek ding a nek lai un, Pathien in a lungthim ah Kross a awh laikha suta a chutpih nu chu pie ding in a hetsak a. Aguk in ahim a, numei nu kawm achun “Pathien in zie hi na kawma pie ding in ei hetsak hi, a ti a, dawhkan chung achun a kawih a. Amah nu chun maksa takin a en a, Kross a thu kizik a sim zawh in ahung kapdawk ta mai a. A mitthi a thiek hul nung in, a bag sung apat in 25 caliber pistol ahun zukdawk zel zel zieng a, maksa'n tangval pa chu a phu guih a. Hiti hin a hun gen a, “Tuni hi ka damsunga ding in coffee ka dawn tawpna ni dinga thupukna ka siem ahi ta'n. Himahlele, Pathien in ei thathampuoitih nang mah mang in ei hetsak a. Tha liemta khan ka chanu'n ei thihsan a, ka pasal in ei taihsan beh nalai a, ka beidawng taluo'n, Pathien in le ei nutsieh hi hiel in ka he a. Zie pistol hi lungsiet tak in la mang ding in a ngen a. Pathien in ei taihsan puoitih ka he thak kit tai,” a ti a. Kipak tak in a nusieh tai. Lalpa'n mihiemte hi bangtienga a lungsiet ahi dem maw! Thihna ding mun ale a hukdawk zel sek hi.

**Lalpa'n,** Muol leh tangte chu hung mang intin; himahleh ka hun lungsietna chun tawp nei ta puo'n a, a tii. (Isai 54:10)

12. Mihing te hi Lalpa mitmuh in bangzat vei zawlsai in nawhchizuok guol in um leu hingle, Pathien kawma I gitlohnau ngai-

hdam I nget chun, Pathien in ngaihdam zawhloh a nei puoi. Hiti tienga Lalpa'n mihiemte a lungsiet / hehpih hi tih I hetdawknunga le I phatsan a, I ginum loh tei tei naklai uchun, I chung ah Lalpa'n bangti'n hih in a, tih na ngaihtuoh kha?

13. "Ruth in na chiehna takah chieh ing ka ting, na giehna taphawt ah giek ing ka ting, na chite chu ka chite hi'n a, na Pathien chuh ka Pathien hi'n tin. Na thihna ah thi'ng ka ting. Zie tak achun kivui mai ding ka hi; Nang leh kei hi thihna tihloh in thildang in ei khen ding chun Lalpa'n a lawh lawh ei lawh mai hen la, zie sanga nasa zaw chun le" a ti a. Ruth in api nu a zuihna dinga a kipumpiek dan hi anasa'n, a zuih loh khak palh ding lau in a kitiem beh nalai hi. Ei haw le Lalpa Pathien I zuihnau ahin, Ruth guola kipumpiek chiet ding in Lalpa'n ei malsawm ta hen, Amen.

~~o0o~~

# EVANGELICAL SYNOD CHURCH

## BOARD OF CHRISTIAN EDUCATION

Secretariat, Chiengkongpang – 795158


### SYNOD BIBLE SCHOOL

#### DIPLOMA IN BASIC THEOLOGY GRADUATES

Name	Village	Average	Class	Course
Mr Haolalthom	K. Laitui	76%	First (A)	Dip.B.T
Mrs. Venny	Chawngchin	75.12%	First (A)	Dip.B.T
Upa T. Jampi Gangte	K. Laitui	73.75%	First (A-)	Dip.B.T
Rev. T. Doukap	D. Phailien	73.9%	First (A-)	Dip.B.T
Mr. Kamzathang Gangte	Chawngchin	73.9%	First (A-)	Dip.B.T
Mr. Goukhuolzou	Santing -I	73.5%	First (A-)	Dip.B.T
Mrs. Chawinu	Haran	72.5%	First (A-)	Dip.B.T
Mr. Mangchungnung	Neihlien	71.8%	First (A-)	Dip.B.T
Mr. Fredy Lienthangvel	Pangen	71.3%	First (A-)	Dip.B.T
Miss Khawlzanieng	Chawngchin	70.6%	First (A-)	Dip.B.T
Mr. Lamkhohao	Tanguom	69.5%	First (B+)	Dip.B.T
Pastor Th Mawia	New Lambulanre	68.6%	First (B+)	Dip.B.T
Mr. Paubik Gangte	K. Laitui	67.8%	First (B+)	Dip.B.T
Mr. L. Sangkhum Gangte	Muntha	67.5%	First (B+)	Dip.B.T
Upa Mangminthang	Chiengkongpang	66.1%	Second (B+)	Dip.B.T
Upa Nengthang	Chawngchin	66.1%	Second (B+)	Dip.B.T
Mr. S. Lienminlal Gangte	Belam Veng	65.7%	Second (B+)	Dip.B.T
Evan. Paukhusuon	D. Phailien	65%	Second (B+)	Dip.B.T



Mr. Khawlnethang	Chawngchin	64.1%	Second (B)	Dip.B.T
Pastor V. Gena	Khanpi	63.1%	Second (B)	Dip.B.T
Evan. H. Lamgin	D. Phaitien	61%	Second (B)	Dip.B.T
Evan. Lientinlal	HQ Belam Veng	60%	Second (B)	Dip.B.T
Upa Niala	Shillong	58%	Second (B-)	Dip.B.T
Mr. D. Lalpu Gangte	K. Phaicham	57.2%	Second (B-)	Dip.B.T
Mr. Thanglalmuon	K. Zoar	57.1%	Second (B-)	Dip.B.T
Upa Henkhosoi	D. Phaitien	56.9%	Second (B-)	Dip.B.T
Upa Paukap	Bijang	56%	Second (B-)	Dip.B.T
Upa Khuolkhokam	Khanpi	53.5%	Third (C+)	Dip.B.T



Rev Dr Ellien Gangte  
Director, BCE,ESC

~~oOo~~

CHAMNA AW PATRON MEMBER LIST

**CHIEF PATRONS:**

1. Pu S. Paukholal	Chief of Bunglon	1994
2. Ebenezer Chapel	D. Phailien	2014
3. ESC Shillong	Shillong	2014
4. Mr. S.K. Juiliana	Lamphel	2014
5. Nk Sawmte K. Gangte	Fujairah,UAE	2015
6. Nk Esther Tinglamkim	Gangte Veng	2015
7. Pu Thangzago (K.Vawmcha)	Chiengkawnpang	2015
8. Langol ESC	Langol	2016
9. Mrs Hosisi W/o Laldawng K.Gangte	Jiribam	2016
10. Upa Letkam	Bunglon	2016
11. Pu (L) Kamgo K.Gangte	Phuolsanbung	2016
12. Shillong Local Missionary Board	Shillong	2016
13. Pu Lunkholal Gangte	New Delhi	2017
14. Pu Noksieik	New Lambulane	2018
15. Nemkholam	New Lambulane	2018
16. ESC Gangte Veng M&B	Gangte Veng	2018
17. Nk. Nancy Nemneihvak	Hill Town	2019

**PATRON MEMBERS:**

1. Pu Henkhojam	Siempat	1994
2. Sep. L. Gangte	5th Assam Regt.	2003
3. Dr. Lalzazdal	Chiengkawnpang	2004
4. Upa Niala	Shillong	2004
5. Pu P. Gangte	Shillong	2004
6. Pu B. Manga	Shillong	2004
7. Pu S.T. Gangte	Shillong	2004
8. Pu Lalkithang	Delhi	2004
9. Rev. Dr. Soson	Dimapur	2007
10. Rev. T. Kampu	Guwahati	2008
11. Pi Phalneihthiem	Dehradun	2008
12. Pu B.K. Gangte	Dehradun	2008
13. (L) Hengo	Chief of Chongmun	2010
14. Upa Dr. L.S. Gangte	Chiengkawnpang	2011
15. Pi Niengzalam	Chiengkawnpang	2011
16. Pu Sangvung	Chiengkwanpang	2011
17. Pu S.K. Gangte	Shillong	2011
18. Pu Lovejoy	Kohima	2013
19. Pu Goginthang	Shillong	2013
20. Pu L. Minlun Gangte	Shillong	2013
21. Pi Lalkim	Shillong	2013
22. Hav. H.L. Gangte	Shillong	2013
23. Ms. Grace Lalbiek	Guwahati	2013
24. Pu L. Neihsiel	Shillong	2013
25. Pu Lamtinlien	Shillong	2013
26. Pu S. Thienlaljoy,	SDO H.Q. Veng	2013
27. Pu L. Sawia	Gangte Veng	2013
28. (L) Lt. Col. L. Gangte	Chiengkawnpang	2013
29. (L) Upa K. Manga Gangte	Shillong	2013
30. Rev.Dr. Th. Lamboi Vaiphei	Hill Town	2015
31. Pu K. Pauboi Gangte	Chiengkawnpang	2015
32. Siemlaljoy	Lamphel	2016

**DIAMOND MEMBER:**

1. Upa Lamkhodem	Chiengkawnpang	2015
2. Mrs Felli	Chiengkawnpang	2015
3. Moizokim (Chloe)	Lamphel	2015
4. Pu Lama B. Gangte	Langol	2016

**GOLD MEMBER:**

1. Pi Niengneihchoi	New Delhi	2014
2. Agape Children Eng. Jr.H/S.	Ithing, Thanga	2016
3. Upa Th. Mangngul	Bunglon	2016
4. Pi Chawimawi	Lamphel	2017
5. Pastor Goulienmang & Family	Tripura	2018
6. Muntha ESC	Muntha	2018

**SILVER MEMBER:**

1. Pi Sailothangi Thangzom	Old Lambulane, Imphal	2014
2. Antioch High School Abicharan	Tripura	2014
3. Upa Thanglal	Bijang	2015
4. Upa Lalthinthang	Gangpimuol	2015
5. Lamneihhat	D. Phailien	2018
6. Pu Sonpee S. Thangzom	Lamphel, Imphal	2018
7. Pu P.L. Manga	Lailak, Mizoram	2018

## EVANGELICAL COLLEGE OF THEOLOGY (ECT)

Nehru Marg, Rengkai, Churachandpur.

### ADMISSION 2019-2020

Kuo le Pathien sapna chang, piengthak, Bible zilnuom te a  
dingin

### Evangelical College of Theology

ah admission bawltheih ahi.

Admission Form submit na  
ding last date: 12 July (Friday), 2019.

Entrance Test ni ding date: 15 July, (Monday), 2019.

#### Admission Form muhtheihna:

- 1) Office ah, Office kaih hun sung in.
- 2) Website, <http://ectindia.com> ah download theih ahi.

A form man hi Rs 150/- ahi.

A Course ziltheih um haw chuh:

- (1) Class X, zo te a dingin : Dip. Th. (2 years)
- (2) Class XII, zo te a dingin : B. Th. (3 years)
- (3) B.Th. (ATA) Or B.A. zo te a dingin : M. Div. (3 years)
- (4) M. Div (ATA) or B.D. zo te a dingin : M. Th. Missiology, (2 years)

#### Rev. T. Kamgin Gangte

Executive Director  
Evangelical Synod Church



ESC, Synod Bible School  
**GRADUATION DAY**

Published by Rev. T. Kamran on behalf of the Evangelical Synod Church  
 Printed at THAWNSAU PRINTING WORKS, CENTRAL LAMKA.

---



---



---



---

PIN 

--	--	--	--	--	--

**Chamma Shw**  
 (Evangelical Monthly)  
 Regd. No. 64436/96  
 E-mail: e7s7c7@gmail.com  
 www.synod church.com

Alak man ..... apat ..... ₹ .....  
 If undelivered pliz return to:  
**ESC SECRETARIAT,**  
**Chiengkawpang, Churachandpur,**  
**Manipur - 795158**